



SPRACHWELTEN

Quai è in signal

Dapi decennis s'occupan ils umans dals egls e da lur influenza sin la relaziun interumana. Il contact optic maina il discours e dat indicaziuns davart la dominanza. «El guarda da surengiu sin mai.» Ils egls tradeschan la tenuta ed ils patratgs dal partenari da discours. Las ureglias audan quai che vegn ditg, ma era quai ch'ellas vulan udir...

Ils senns vegnan duvrads sco arma. Cunzunt l'egliada «nauscha», «admoninta», «steria» u «fraida» tradescha il bainstar d'in uman. La gronda sfida è d'identifitgar endretg il signal da comunicaziun. Ils inamurads tschertgan inconscientamain l'engrondiment da la pupilla. Quella dals umens vegn trais giadas pli gronda, sch'ins mussa ad els films erotics. Las pupillas da las dunnas creschan gia, sch'ins mussa ad ellas mammas cun uffants. Auza in u l'auter alura anc sias survantscheglias, vegn quella mimica anc ina giada interpretada autramain. L'endretga egliada en il dretg mument exprima dentant vardaivladad.

Ils pli sincers èn anc adina ils uffants. Di in uffant manzognas, vegn el suenter per regla a tegnair immediat ils mauns davant la bucca. Cun la vegliadetgna vegni per ordinari pli grev da differenziar tge ch'è gist e tge betg, ma la lingua dal corp na di en general betg manzognas. L'arma da la dunna è era quella d'identifitgar la lingua dal corp. Da natira ennà ha ella l'abiltad da decodar ils signals dal corp. Perquai vesa la schlattaina feminina en mintga mimica in signal. In dischavantatg è che la dunna dovra en tschertas situaziuns memia pauc las ureglias e sa fida memia gugent da sia intuiziun. Quai maina alura savens a malchapientschas. Per il solit sa chapeschan las duas schlattainas a moda fallada. Qua na gida magari l'entira lingua dal corp nagut pli. Tgi che serra alura anc dal tutfatg las ureglias, na po segiramain betg quintar d'avair success en la comunicaziun. I na nizzegia betg bler da duvrar sco arma ils senns, meglier ditg ils egls, ma egls che traglischan da larmas tradeschan deplorablamain pli spert la tristezza che milli plets. In fatg è ch'ins po blessar pli fermamain in conuman cun ina comunicaziun nunverbala che cun blastemmas. Ma quai san per il solit mo las dunnas ed ils umens chaminan tschorvamain tras il mund – ed audan puspè da quai ch'els na duessan betg udir... Igl è remartgabel tge ch'ins vegn dad effectuar cun ils egls e las ureglias. «N'è quai betg in signal?» Jau cuntinuesch ad analisar sia comunicaziun nunverbala.